

- Surrexit hic, et astitit,
 Ab igne qualis rediit,
 20 Auro probato similis,
 Quando per ignem transiit.
 'O Christe', dixit, 'nunc meus
 Tortor revixit Decius.
 Rursus parat craticulam,
 25 Rursusque thesauros avet.
 Et quos ego conghesseram
 Dandos in usus pauperum,
 Furatus illi prodidit
 Mercator impurus Symon.
 30 Nam primus assultus tuli
 Leodiensis Symonis.
 Tu scis, mihi quid fecerit,
 Me quomodo nudaverit.
 Sic est enim, sicut tibi
 35 Virgo parens innotuit.
 Memento, qui iudex meus
 Et testis es et conscius,
 Quod cor meum probaveris
 Examinans incendiis,
 40 Et non meis in renibus
 Iniquitas inventa sit.
 Ob hoc precor munda prece:
 Detur locus voci meae,
 Iam res iacentes releva,
 45 Causam meam iam iudica'.
 Tunc dominus, qui simplicis
 Respexit Abel hostiam,
 Respexit ad Laurentium,
 Qui concrematus ignibus,
 50 Odor suavitatis est
 Ex viva factus hostia.

XII.

- Ecce! desertis redit a Florinis
 Ille precursor domini Iohannes,
 Afferens scissam tunicam, cameli
 Vellere textam.
 5 Non erat sponsus, sed amicus eius;
 Et tamen, sponsam quia diligebat,
 Fornicatores et adulterantes
 Oderat omnes.
 Propter hoc ira subigente iusta
 10 'Sunt', ait, 'iuste nimium querelae,
 Quas agit coniunx. Pateris malignos
 Vivere mechos?